

terat viribus urget, continuata pulsatione mœnia quassat, simulque novis operibus castra communit.

Die XXI Decembris in colle mille plus minus pass. à castris Comes *Tir-Oen* cum copiis se ostendit, & ibi castra metatus, postero itidem die se eodem in loco ostendit, nocte subsequente, & Hispani ex opido eruperunt, & Hibernici in opidum se emittere conati sunt, verum utrique rejiciuntur. Die XXXIII majora tormenta in opidum displodunt Angli quasi de Comite jam proximo minime solliciti, eodemque die literæ *D'Aquila* ad Comitem intercipiuntur, quibus obsecrat, ut Hispani nuper advecti in opidum immittantur, & utrinque castra aggredierentur. Nocte cum jam Luna horizontem subitura, Henrico *Poerio* mandavit Prorex ut octo signa veteranorum in aciem educeret, & ad occiduam castrorum partem aciem instrueret. Henricus *Greamus*, qui ea nocte equitibus excubitoribus præfuit, summo mane significavit Proregi hostes certo moturos, quod eorum igniarii fomites accensimagno numero collucebant. Hinc ad arma conclamat per castra, & quacunque aditus in opidum patuit, cohortes dispositæ. Prorex ipse cum Momoniæ Præsidente, & Richardo *Wingfeild* Marescallo versus procubitores tendit, simulque consilio Olivari *Lambardi* locum deligit, ubi hostes prælio exciperet; quo perductæ fuerunt vexillationes Henrici *Folliot*, & Olivari *S. Iohn* cum sexcentis classiariis sub ductu Richardi *Leveson*. At Comes *Tir-Oen*, cui animo destinatum erat Hispanos recentes & DCCC Hibernicos (ut postea innotuit) per tenebras in Kinsaliam intulisse, cum jam diluxisset videret, & Marescallum & Henricum *Danvers* cum copiis equestribus & *Poerium* cum suis veteranorum vexillationibus ad collis radicem conspiceret, spe sua excussus substitit, & mox receptui per utricularios cecinit. Quamprimum de hoc receptu satis confuso Prorex certior factus, iussit suos ut hostes insequerentur & ipse ante principia se contulit, ut eorum recessum observaret, & pro re nata consilia caperet, sed tam spissa caligo cum violento nimbo terris incubuit, ut conspectum aliquantisper eriperet. Serenato mox cœlo cum observaret, eos tribus agminibus magnis, & equitibus à tergo positis trepide recedere, omnino statuit eos aggredi, remisso Momoniæ Præsidente cum tribus equitum alis in castra ad Hispanorum ex opido irruptionem, si quam facerent, cohibendam. Ipse vero Prorex tanta festinatione recedentes subsequitur, ut gradum sistere cogeret in margine vliginosi & voraginosi loci, & ad quem nisi vado nullus accessus, sed equitibus qui vadum servabant virtute, Marescalli, & Comitis *Clan-Ricard* pro-

fligatis in equestres hostium turmas illi impetum animose fecerunt, quem, cum Guil. *Godolphin* qui Proregis alam duxit Henricus *Danvers*, *Minshaw*, *Taff*, *Fleming*, & *I. Barkley* castrorum præfectus se conjunxissent, tanta alacritate iterarunt, ut rebelles fugam capefferent. Nec fugientes insequi visum, sed collectis viribus in mediam aciem jam trepidantem involarunt, & perruperunt. Tirellus cum suis & Hispanis interim firmo pede suo loco perstiterunt, contra quos postremam suam aciem Prorex promovet, utque non solum ducis munera imperando, sed etiam militis dimicando expleret, cum tribus Olivarii *S. Iohn* vexillationibus quos *Roe* duxit, in illos irrui, ordinesque ita perfregit ut confusim se ad Hibernicos receperint, à quibus statim sunt cædi derelicti, & ab equestri Proregis turma Guilielmo *Godolphin* ductore, magna cum clade protriti. Tunc Comes, *O-Donellus* & reliqui undique in fugam effusi projectis armis sibi consulverunt, Alphonfus *O-Campo* captus cum tribus Hispanorum ductoribus, & sex signiferis, cæsi CIO CC signa IX capta, quorum sex Hispanica. Ex Anglorum parte vix unus & alter desiderati, multi vulnerati, & inter eos Henricus *Danvers*, Guilielmus *Godolphin*, & *Croft*, tantulo impendio tanta stetit victoria. Prorex cum receptui cecinisset, Divino numini inter conferta cadavera gratias ob victoriam relatis, Comitem *Clan-Ricard* equestri dignitate ob operam hoc prælio fortissime navatam exornat, victorque faustis acclamationibus in castra rediit, quæ ab omni periculo sarta tecta invenit. Hispani enim in opido cum omnia undique præfidiis munita conspicerent, irruptiones omnes sibi damnosas antea experti, anxia expectatione solliciti se domi continuerunt.

Victoria hæc magna & multiplex qua Hibernia nutans & jamjam defœtura reventa, Hispani ex Hibernia submoti, Archi-rebellis *Tir-Oen* in Ultoniæ latibula rejectus, *O-Donellus* in Hispaniam fugatus, cæteri seditiosi in varias partes profligati, regia autoritas perditorum insolentia imminuta recuperata, proborum animi qui modo fracti & afflicti, confirmati atque renovati, pauloque post alta pax ubique per insulam solide fundata.

Die postero Prorex *Bodleio* vallorum præfecto qui in operibus & etiam in prælio strenue se gesserat, ut moles inchoata perficeretur, & aggeres propius hostes admoventur imperat, in quibus cum sex dies insumpti, *D'Aquila* literis per Tympanistam ad Proregem missis, petiit ut nobilis aliquis fide dignus in opidum mitteretur quocum colloquium institueret. Ad hoc eligitur Guilielmus *Godolphin* vir dignitate equestri, cui *D'Aquila* significat se Proregem etsi acerrimum hostem, tamen honorandum